


105322,



Thovacic

ORDO

AD TERTIAM

SYNODUM DIOECESANAM

ECCLESIAE LAVANTINAE,

ANNO 1900 HABENDAM,

CURA ET IUSSU

CELSISSIMI AC REVERENDISSIMI

DOMINI DOMINI

MICHAELIS,

PRINCIPIS-EPISCOPI LAVANTINI,

EDITUS.




MARBURGI, 1900.

SUMPTIBUS PR.-EP. ORDINARIATUS LAVANTINI.

TYPIS TYPOGRAPHIAE S. CYRILLI.

105322



105322



FBC 5081/1957

Praenotanda.



ctiones Synodi dioecesanæ, cuius faciendæ norma secundum rubricas Caeremonialis Episcoporum nec non Pontificalis Romani hisce explicatur, auxiliante Deo expedientur in Congregationibus et publicis Sessionibus omnium ad Synodum convenientium.

Congregationes habebuntur:

1. *particulares* seu consultationes Commissionum, praesentibus videlicet illis Synodi Sodalibus, qui pro singulis Commissionibus Consultores constituentur;
2. *generales*, quibus omnes Synodi Sodales et Officiales interesse iubentur.

Sessiones publicae illi vocantur omnium Synodi Sodalium *sollemnes* consessus, in quibus servato ritu sacro per *Caeremoniale* et *Pontificale* praescripto, quae ad Synodum pertinent, peraguntur et, quae in Synodo decreta sunt, sollemniter promulgantur.

Expedientur vero actiones synodales tribus *Sessionibus publicis*, quibus quinque Congregationes generales praemittentur, pridie cuiuslibet Sessionis publicae habendae; *Congregationes* particulares seu consultationes Commissionum autem locum habebunt tempore libero.

Sessiones publicae et *Congregationes* generales celebrabuntur in ecclesia s. *Aloysii*; *Congregationes* particulares vero in Seminario clericorum maiori et minori vel in aliis locis convenientibus.



De prima Congregatione generali.

Ad rite praeparandam actionem *primae Sessionis publicae* pridie hora pomeridiana quarta habebitur *prima Congregatio generalis*.

1. Omnes ad Synodum vocati, saeculares veste talari et choralis cum birreto, regulares habitu sui ordinis et superpelliceis induti, congregantur in Ecclesia cathedrali s. Ioannis Bapt. Exinde procedunt cruce Ecclesiae cathedralis praelata in Aulam episcopalem, unde fit processio sollemnis in ecclesiam s. Aloysii campanis ecclesiae cathedralis continuo pulsatis.

Ordo in processione: Clerus iuxta dignitatem et antiannitatem, Reverendissimus Antistes, Capitulum cathedrale. Pie religioseque processioni interessentibus et sequentes hymnos et psalmos recitantibus quadraginta dies de vera indulgentia in consueta ecclesiae forma vi canonis 62. Concil. Lateran. IV. conceduntur.

Hymni.

- I. In gloriam Christi Dei hominis.

Vexilla Regis pródeunt,
Fulget Crucis mystérium,
Qua vita mortem pértulit,
Et morte vitam prótulit.

Quae vulneráta lánceae
Mucróné diro críminum
Ut nos laváret sórdibus,
Manávit unda et sángine.

Impléta sunt, quae cóncinit,
David fidéli cármine,
Dicéndo natió nibus:
Regnávit a ligno Deus.

Arbor decóra et fúlgida,
Ornáta Regis púrpura,
Elécta digno stípite
Tam sancta membra tángere.

Beáta cuius bráchiis
Prétium pepéndit sáeculi,
Statéra facta córporis,
Tulítque praedam tártari.

O Crux, ave, spes única,
In hac triúmphi glória
Piis adaúge grátiam,
Reísque dele crímina.

Te, fons salútis, Trínitas,
Collaúdet omnis spíritus:
Quibus Crucis victóriam
Largíris, adde práemium. Amen.

II. In honorem B. M. Virginis.

Ave maris stella,
Dei mater alma,
Atque semper virgo,
Felix coeli porta.

Sumens illud Ave
Gabriélis ore,
Funda nos in pace,
Mutans Hevae nomen.

Solve vincla reis,
Profer lumen caecis,
Mala nostra pelle,
Bona cuncta posce.

Monstra te esse matrem,
Sumat per te preces
Qui pro nobis natus
Tulit esse tuus.

Virgo singuláris,
Inter omnes mitis,
Nos culpis solútos
Mites fac et castos.

Vitam praesta puram,
Iter para tutum,
Ut vidéntes Iesum
Semper collaetémur.

Sit laus Deo Patri,
Summo Christo decus,
Spirítui Sancto:
Tribus honor unus. Amen.

III. In laudem s. Michaelis archangeli et omnium
ss. Angelorum.

Te splendor, et virtus Patris,
Te vita, Iesu, córdium,
Ab ore qui pendent tuo,
Laudámus inter Angelos.
Tibi mille densa míllium
Ducum coróna militat:
Sed éxplicat victor crucem
Michael salútis sígnifer.
Draconis hic dirum caput
In ima pellit tártara,
Ducémque cum rebéllibus
Coelésti ab arce fúlminat.
Contra ducem supérbiae
Sequámur hunc nos Principem,
Ut detur ex Agni throno
Nobis coróna glóriæ.
Patri simúlque Filio,
Tibíque sancte Spíritus,
Sicut fuit, sit iúgiter
Saeculum per omne glória. Amen.

Psalmi.

I. Psalmus 8:

Dómine Dóminus noster, * quam admirábile est
nomen tuum in univérſa terra.

Quóniam eleváta est magnificéntia tua * super
coelos.

Ex ore infántium et lacténtium perfecísti laudem
propter inimícos tuos, * ut déstruas inimícum
et ultórem.

Quóniam vidébo coelos tuos ópera digitórum tu-
órum: * lunam et stellas, quae tu fundásti.

Quid est homo, quod memor es eius? * aut fílius
hóminis quóniam vísitas eum?

Minuísti eum paulo minus ab ángelis, glória et
honóre coronásti eum, * et constituísti eum
super ópera mánuum tuárum.

Omnia subiecísti sub pédibus eius, * oves et boves
univérsas, insuper et pécora campi.

Vólucres coeli et pisces maris, * qui perámbulant
sémitas maris.

Dómine Dóminus noster: * quam admirábile est
nomen tuum in univérſa terra!

Glória Patri etc.

II. Psalmus 14:

Dómine, quis habitábit in tabernáculo tuo? * aut
quis requiéscet in monte sancto tuo?

Qui ingréditur sine mácula, * et operátur iustitiam.

Qui lóquitur veritátem in corde suo, * qui non
egit dolum in lingua sua:

Nec fecit próximo suo malum, * et oppróbrium non accépit advérsus próximos suos.

Ad níhilum dedúctus est in conspéctu eius malígnus: * tíméntes autem Dóminum gloríficat.

Qui iurat próximo suo, et non decípit, * qui pecúniam suam non dedit ad usúram, et múnera super innocéntem non accépit.

Qui facit haec, * non movébitur in aetérnum.
Glória Patri etc.

III. Psalmus 23:

Dómini est terra et plenitúdo eius; * orbis terrárum et univérsi, qui hábitant in eo.

Quia ipse super mária fundávit eum, * et super flúmina praeparávit eum.

Quis ascéndet in montem Dómini? * aut quis stabit in loco sancto eius?

Innocens mánibus et mundo corde, * qui non accépit in vano ánimam suam, nec iurávit in dolo próximo suo.

Hic accípiet benedictiónem a Dómino: * et misericórdiam a Deo salutári suo.

Haec est generátio quaeréntium eum, * quaeréntium fáciem Dei Iacob.

Attóllite portas, príncipes, vestras, et elevámini portae aeternáles, * et introíbit rex glóriae.

Quis est iste rex glóriæ? * Dóminus fortis et
potens, Dóminus potens in prælio.

Attóllite portas, príncipes, vestras, et elevámini
portae aeternáles, * et introíbit rex glóriæ.

Quis est iste rex glóriæ? * Dóminus virtútum
ipse est rex glóriæ.

Glória Patri etc.

IV. Psalmus 45:

Deus noster refúgium, et virtus: * adiútor in tri-
bulatióibus, quae invenérunt nos nimis.

Proptérea non timébimus, dum turbábitur terra: *
et transferéntur montes in cor maris.

Sonuérunt, et turbátae sunt aquae eórum: * con-
turbáti sunt montes in fortitúdine eius.

Flúminis ímpetus laetificat civitátem Dei: * sanc-
tificávit tabernáculum suum Altíssimus.

Deus in médio eius, non commovébitur: * adiu-
vábít eam Deus mane dilúculo.

Conturbátae sunt gentes, et inclináta sunt regna: *
dedit vocem suam, mota est terra.

Dóminus virtútum nobíscum: * suscéptor noster
Deus Iacob.

Veníte, et vidéte ópera Dómini, quae pósuit pro-
dígia super terram: * aúferens bella usque ad
finem terrae.

Arcum cōteret, et confrīget arma: * et scuta combúret igni.

Vacáte, et vidéte, quóniam ego sum Deus: * exaltábor in géntibus, et exaltábor in terra.

Dóminus virtútum nobiscum: * suscēptor noster Deus Iacob.

Glória Patri etc.

V. Psalmus 97:

Cantáte Dómino cánticum novum: * quia mirabília fecit.

Salvavit sibi dēxtera eius, * et bráchium sanctum eius.

Notum fecit Dóminus salutáre suum: * in conspéctu géntium revelávit iustítiam suam.

Recordátus est misericórdiae suae, * et veritátis suae dómui Israel.

Vidérunt omnes términi terrae: * salutáre Dei nostri.

Iubiláte Deo omnis terra * cantáte, et exultáte, et psállite.

Psállite Dómino in cíthara, in cíthara et voce psalmi: * in tubis ductilibus, et voce tubae córneae.

Iubiláte in conspéctu Regis Dómini: * moveátur mare et plenitúdo eius; orbis terrárum, et qui hábitant in eo.

Flúmina plaudent manu, simul montes exultábunt
a conspéctu Dómini: * quóniam venit iudicáre
terram.

Iudicábit orbem terrárum in iustítia, * et pópulos
in aequitáte.

Glória Patri etc.

VI. Psalmus 116:

Laudáte Dóminum omnes Gentes: * laudáte eum
omnes pópuli.

Quóniam confirmáta est super nos misericórdia
eius: * et véritas Dómini manet in aetérnum.

Glória Patri etc.

VII. Psalmus 132:

Ecce quam bonum, et quam iucúndum * habitáre
fratres in unum!

Sicut unguéntum in cápite, * quod descéndit in
barbam, barbam Aaron:

Quod descéndit in oram vestiménti eius: * sicut
ros Hermon, qui descéndit in montem Sion.

Quóniam illic mandávit Dóminus benedictiónem, *
et vitam usque in sáeculum.

Glória Patri etc.

In ingressu ecclesiae synodalis: Antiphona: Salve
Regina cum V. et R. et oratione.

Nota. Qui crucem in Processione fert, Clericus saltem sit superpelliceo indutus, servet in omnibus decorem tanti vexilli, quod praefert, apte, decore et recte ferat, graviter et religiose incedat. Acolythi hinc inde cum candelabris accensis et in angustiori loco praeceant, Crucifer sequatur. Clerus ordine sequatur cum reverentia et religiosa devotione, ut exemplo suo excitetur populus ad pietatem. Salutationibus non vacent, colloquiis inter se abstineant, oculorum vagationem vitent. Bini aequae procedant et ne minimum quidem ab ordine discedant. Certum spatium semper servant inter se. In via nunquam subsistant, nisi iussi a Praefectis. Hymnos et Psalmos cantent ad praescriptum et de libro, ne errent.

2. Quum processio in ecclesiam seminarii clericalis venerit, Synodales loca ibi parata occupabunt, quae durante Synodo tenebunt. Quando processio non fit, Synodi Sodales veste talari cum birreto, regulares habitu sui ordinis, Officiales vero, exceptis Iudicibus synodalibus, Praefectis hospitiorum et Confessariis, veste choralis induti in ecclesia apparebunt.
3. Celsissimus Antistes accipit stolam rubei coloris et flexis genibus incipit hymnum: *Veni Creator*, quo alternatim recitato post *Collectam* de Spiritu Sancto dicit orationem: *Adsumus*¹. Sequitur *allocutio inauguralis*.
4. Praelecto mox decreto de *Officialibus Synodi* Promotor, Secretarius, Notarius et Procurator cleri loca designata occupabunt, demandato sibi munere functuri.

¹ Pag. 23 — 24.

5. Accedit *Promotor* ad sedem Episcopi instans, ut actiones primae Sessionis publicae indicantur et prae-
parentur.
6. Accepto Praesulis mandato praelegit *Secretarius* Sum-
marium istarum actionum.
7. Sequitur *Promotoris* instantia de constituendis et
respective approbandis in Synodo *Examinatoribus*
Cleri.
8. Praelectis per *Secretarium* nominibus eorum, quos
Ordinarius constituit *Examinatores Ordinandorum*,
proponuntur per Celsissimum *Examinatores promo-*
vendorum ad beneficia curata in Synodo approbandi;
facto dein per Promotorem, Secretarium et Notarium
scrutinio, publicantur nomina eorum, quos Synodus
approbavit.
9. Sequitur *Promotoris* instantia de constituendis *Com-*
missionibus pro deliberanda Synodi materia.
10. | Exposita per Antistitem methodo, qua consultationes
in Congregationibus *particularibus* expediendae erunt,
praelegentur nomina eorum, quos singularum Sectio-
num *Praesides, Consultores, Referentes et Notarios*
elegerit; quibus mox materia deliberanda exhibetur.
11. Facta dein indictione *primae Sessionis publicae fit*
*gratiarum actio*¹, et Congregatio dimittitur.
12. Eodem vespere ab hora sexta usque ad septimam
campanae Ecclesiae cathedralis, Ecclesiae b. Mariae,
s. Magdalenae et s. Aloysii sollemniter pulsantur.



¹ Pag. 24—25.

De prima Sessione publica.

1. **H**ora *septima matutina* omnes Synodi *Officiales et Sodales* convenient in *ecclesia s. Aloysii*, et cum rite parati fuerint¹, ordinatur *Processio* ad valvas *ecclesiae*, adventum *Celsissimi* expectatura.
2. *Ordo Processionis* sequens erit:
 - a) Praefertur *crux Ecclesiae cathedralis*;
 - b) *Clerus* ad Synodum vocatus, et quidem *praeuntibus* illis, qui non sunt *beneficiati* cum cura *animarum*, *parochi rurales*, sequentibus mox *decanis*;
 - c) *Seminarii dioecesani Superiores et Theologiae Doctores* atque *Professores*;
 - d) *Praepositus Petoviensis* et *Abbas saecularis Celeiensis*;
 - e) *P. Abbas Trappistarum* vel eius *Vicarius*;
 - f) *Clerus Ecclesiae cathedralis*;
 - g) *Magistri Caeremoniarum*, *Acolythi* et *Ministri* pro faciendo *Sacro*;
 - h) *Capitulum cathedrale* in corpore procedens.
3. *Ecclesiam ingressus* occupabit *Clerus synodalis sedilia*, quae in *ecclesiae navi* a dextris et sinistris posita sunt, prout eis per *Magistrum Caeremoniarum* assignabuntur.
4. Mox cum *Celsissimus Antistes* sedem suam occupaverit, persolvitur *Tertia*. Qua finita et paratis omnibus, quae ad *Sacrum* requiruntur, procedit *Episcopus* ad *altare*, et intonat hymnum: „*Veni Creator Spi-*

¹ *Clerus* ad Synodum vocatus *superpelliceis et birretis* indutus sit in sessionibus publicis.

- ritus“. Absolutis dein versiculo, responsorio et competenti oratione celebrabit *Missam de Spiritu sancto*¹.
5. Finita Missa Episcopus depositis Paramentis accipit *Pluviale* rubrum cum *Mitra*, accedit ad altare et genuflexus incipit Antiphonam: *Exaudi*, et persolvuntur *preces*, prout Pontificale Romanum pro prima Sessione praecipit.²
 6. Recedentibus dein Acolythis inchoatur *Sessio*, si *tempus permiserit, sermone synodali*. Quo finito *Promotor* more in Synodis usitato instat pro publicatione Decretorum, ad formam Synodi pertinentium, videlicet de *aperienda Synodo*; de *emittenda professione fidei*; de *Ministris synodalibus*; de *praeiudicio non afferendo*; de *modo vivendi in Synodo*, et de *non discedendo*. — Singula Decreta annuente Antistite per *Secretarium* Synodi vel per eius *Lectorem* praeleguntur.
 7. Promulgato decreto de *emittenda fidei professione* Episcopus deposita *Mitra*, conversus ad altare genuflectit, et manu *libro Evangeliorum* admota, voce elevata *professionem fidei* emittit, ceteris eum *communi recitatione* sequentibus³. — Facta recitatione Pontifex in genua provolutus et dextera sacrosanctis Evangeliiis imposita *iuramentum* emittit in hanc formam: Ego Michael, Princeps-Episcopus Lavantinus, promitto, spondeo, profiteor, detestor, anathematizo, voveo et iuro iuxta Professionis fidei formulam a Pio

¹ Glor. una Orat. Credo, Praef. de Spirit. et ult. *Evang.* s. Ioannis.

² Pag. 25—35. — ³ Pag. 49—52.

IV. et Pio IX. praescriptam, singula singulis referendo: Sic me Deus adiuvet et haec sancta Dei Evangelia! Dein sedens accipit *Mitram et librum Evangeliorum*; moxque omnes in Synodo congregati *trini ac trini* accedunt, et tres digitos manus dexteræ, in sollemni iureiurando elevari solitos, nudos ponunt super initium sancti Evangelii secundum Ioannem ac formulam iuramenti finalem dicunt: *Ego idem N. N. spondeo, voveo ac iuro. Sic me Deus adiuvet et haec sancta Dei Evangelia*. In fine osculantur textum Evangelii.¹

8. Ad instantiam *Promotoris* promulgatur per *Secretarium* Decretum de approbatis in Synodo *Examinatoribus promovendorum ad beneficia curata*, qui, si praesentes fuerint, statim accedunt ad Antistitem, sollemni iuramento devinciendi.
9. Promulgatis dein, quae Antistes in hac Sessione prima promulganda decrevit, sequitur instantia *Promotoris*, ut proxima Sessio indicatur et de Sessionis habitae actione *Instrumentum* conficiatur (instantia pro rogitu Notarii).
10. Quibus actis Episcopus *sollemnem benedictionem* impertitur. Dein depositis vestibibus ordinatoque recessu Clerum in valvis ecclesiae dimittit et in Aedes episcopales redit.



¹ Collectio rituum dioecesis Lavantinae. Marburgi, 1896
Pag. 437—441.

De Congregationibus particularibus.

Actiones *Congregationum particularium* expediuntur per *quatuor Commissiones*, quarum singulis Episcopus peculiarem materiae synodalis partem committet deliberandam.

Sessiones harum *Commissionum* habebuntur tempore opportuno. Pro qualibet *Commissione* parabitur in aedibus Seminarii maioris et minoris episcopalis peculiare *conclave*, in quo eiusdem *Commissionis* Consultores hora accuratius adhuc determinanda ad faciendam actionem synodalem convenient.

Actioni praemittuntur *preces*¹, per sodales et Praesidem dicendae, cuius erit, consultationes optimo, quo fieri poterit, modo dirigere, et curare, ut de actione Sessionis per *Notarium*, quem ipse designaverit, conficiatur Instrumentum seu *Protocollum* finita actione praelegendum et Episcopo, cum *eodem die ad faciendam Congregationem generalem* venerit, exhibendum. — Ad Praesides harum *Commissionum* pertinet quoque, ut *Procuratori cleri* in scriptis tribuant *vota et consilia* singulorum Consultorum, quatenus isti petierint, ut de his suis desideriis in *Congregationibus generalibus* annuente videlicet Ordinario publice agatur. — In fine Sessionum persolvetur *gratiarum actio*².



De secunda Congregatione generali.

Secunda Synodi Congregatio generalis eodem die a meridie habebitur hora *quarta*. (Si variae circumstantiae,

¹ Pag. 23—24. — ² Pag. 24—25.

uti personarum, locorum et temporum, permiserint, *haec Congregatio* hora secunda pomeridiana in *sacello sanctae Crucis* in episcopali Praedio *Vindenavii* celebrabitur).

Adveniente Antistite persolventur *Vesperae cum Completorio*; quibus finitis more solito incipit *actio synodalis*.

Habebitur *prima meditatio*. Deinde Episcopus, prout opportunum duxerit, dilucidabit singulas propositae materiae synodalis partes, quibus actis ad instantiam *Promotoris* consilia et desideria Cleri per illius *Procuratorem* exponentur.

Deinde Ordinarius instruit Clerum de *Iudicibus in partibus*, sique ei placuerit, Clero renuntiat, quos huic obeundo muneri devinciendos statuerit. Pari modo, si ei in Domino consultum videbitur, eligit nominabitque viros, quos *Iudicii sui ecclesiastici* in causis criminalibus et civilibus nec non matrimonialibus constituerit Consiliarios.

His actis ad *Promotoris* instantiam praelegetur per *Secretarium Summarium* proximae *Sessionis publicae*, qua indicta preces pro *gratiarum actione*¹ fiunt.



De altera Sessione publica.

Die sequenti celebrabitur altera *Sessio publica*.

Hora *septima* convenient omnes Synodi *Sodales et Officiales* in *ecclesia ad s. Aloysium* ibidemque paratis parandis expectant Antistitem. Qui quum post horam septimam *Cappa* indutus venerit, Clero in locis designatis disposito, persolvitur *Tertia*.

¹ Pag. 24—25.

Sequitur *Missa pro defunctis* episcopis et sacerdotibus dioecesis Lavantinae per Dignitarium e Capitulo ecclesiae cathedralis celebranda.¹ *Missa finita* induitur Episcopus Paramentis nigris pro facienda *Absolutione*.

Quibus peractis inchoatur *Sessio altera publica* precibus, quae *pro secunda die* in Pontificali Romano describuntur.² Sequitur *Concio synodalis* et *lectio* eorum, quae Ordinarius promulganda decrevit.

Si Antistiti placuerit, advocantur constituti *Iudices in partibus* et *Iudicii dioecesani Consiliarii* ad praestandum iuramentum per tactum *Evangeliorum vel Reliquiarum Sanctorum*, ex Reliquiario altaris maioris Ecclesiae cathedralis apportatarum more vetusto.

Indicta *Sessione proxima* Episcopus sollemnem *benedictionem* elargitur. Depositis vestibibus factoque recessu Clerum in ostio ecclesiae dimittit.



De tertia, quarta et quinta Congregatione generali.

I. *Hora quarta* erit *tertia Congregatio generalis* modo supra praescripto. Habebitur *secunda meditatio*.

II. Die sequenti peragetur *quarta Congregatio generalis*, ad quam Clerus synodalis eadem hora et eodem modo, sicuti priori pagina describitur in altera *Sessione publica*, conveniet.

¹ Cum unica Collecta „Deus, qui inter apostolicos.“ Epist. et Evang., quae in Missali habentur in prima *Missa pro defunctis*.

² Pag. 35—38.

Absoluta, cum ad ecclesiam venerit Celsissimus Antistes, *Tertia*, celebratur per Canonicum Capituli cathedralis *Missa de die*, cui Episcopus assistet indutus *Pluviali albi coloris*.

Peracta Missa inchoatur *Congregatio* precibus ad hoc praescriptis. Dein habebitur *meditatio tertia*. Qua absoluta publicantur *Constitutiones*, quas Illustrissimus Antistes decreverit. Quibus actis preces fiunt pro *gratiarum actione*. Deinde tempus liberum pro *facienda confessione sacramentali*.

III. Hora *quarta* habebitur *quinta et ultima Congregatio generalis* modo supra descripto.



De tertia et ultima Sessione publica.

Die sequenti celebrabitur *Sessio publica finalis*, ad quam Clerus synodalis hora *sexta* vel alia iuxta temporis exigentias definienda et modo, sicuti priori pagina describitur, conveniet.

Absoluta, cum ad ecclesiam venerit Antistes, *Tertia*, cantatur per Antistitem *Missa de ss. Trinitate*¹, sub qua sacerdotes assumptis stolis accedunt ad sacram *communio-nem*, qua accepta sumunt *ablutionem*.

Peracta Missa inchoatur *Sessio postrema* precibus, pro *die tertia* in Pontificali praescriptis².

¹ Addita oratione pro gratiarum actione sub duplici *conclusionem*.

² Pag. 39—41.

Praemisso *sermone synodali* publicantur, quae Antistes decreverit, et absoluta actione excipit Clerus monita Episcopi de observantia Statutorum synodaliū.

Dein praelegitur *Syllabus* omnium et singulorum, qui huic Synodo dioecesanae praesentes adesse debent. Absentes notentur.

Postquam ad instantiam Promotoris lectum fuerit *decretum* tum de *Synodo finienda*, tum de illa, quae proxime habenda erit, Episcopus subscribit statutis; postea coram *Venerabili exposito et incensato* intonat more solito hymnum: *Te Deum laudamus*, quem Clerus alta voce prosequitur. Hymno finito Episcopus subnectit orationem finalem: *Nulla est Domine*.¹

Deinde fit, praemissa Celsissimi Praesulis *instructione, Dedicatio et Consecratio* cleri sacratissimo Cordi Iesu.² Quam sequitur *apertio* portarum ecclesiae necnon *publicatio* plenariarum *Indulgentiarum* et praelectio *decreti* de *Synodo dimittenda* ac sollemnis Clero impertienda *benedictio*; qua data persolvuntur *Acclamationes*.³

Denique primus *Diaconus* Pontifici assistens alta voce dicit: „*Recedamus in pace*“, cunctisque acclamantibus: „*In nomine Christi*“. Episcopus sacras vestes deponit ordinatoque recessu Clerum in foribus ecclesiae in nomine Domini dimittit atque in Episcopium se confert.



¹ Pag. 42. — ² Pag. 42—44. — ³ Pag. 44—48.

Preces in Synodo persolvendae.¹⁾

A) In Congregationibus generalibus et particularibus:

1. Ante actionem synodalem:

Veni Creator Spiritus — Mentis tuorum visita —
Imple superna gratia — Quae tu creasti pectora.

Qui diceris Paraclitus — Altissimi donum Dei —
Fons vivus, ignis, charitas — Et spiritalis unctio.

Tu septiformis munere — Digitus paternae dexteræ
— Tu rite promissum Patris — Sermone ditans guttura.

Accende lumen sensibus — Infunde amorem cordibus
— Infirma nostri corporis — Virtute firmans perpeti.

Hostem repellas longius — Pacemque dones protinus
— Ductore sic te praevio — Vitemus omne noxium.

Per te sciamus da Patrem — Noscamus atque Fi-
lium — Teque utriusque Spiritum — Credamus omni
tempore.

Deo Patri sit gloria — Et Filio, qui a mortuis sur-
rexit ac Paraclito, — In saeculorum saecula. Amen.

℣. Emitte Spiritum tuum, et creabuntur.

℞. Et renovabis faciem terrae.

Oremus. Deus, qui corda Fidelium Sancti Spiritus
illustratione docuisti, da nobis in eodem Spiritu recta
sapere, et de eius semper consolatione gaudere. Per Do-
minum nostrum Iesum Christum Filium tuum, qui tecum
vivit et regnat in unitate eiusdem Spiritus sancti Deus
per omnia saecula saeculorum. Amen.

Adsumus, Domine sancte Spiritus, adsumus peccati
quidem immanitate detenti, sed in nomine tuo specialiter

¹⁾ Cfr. Pontif. Rom. Ordo ad Synod.

aggregati; veni ad nos, adesto nobis, dignare illabi cordibus nostris; doce nos, quid agamus; quo gradiamur, ostende; quid efficiamus, operare. Esto solus et suggestor et effector iudiciorum nostrorum, qui solus cum Deo Patre et eius Filio nomen possides gloriosum; non nos patiaris perturbatores esse iustitiae, qui summe diligis aequitatem; ut sinistrum nos non ignorantiae trahat; non favor inflectat; non acceptio muneris vel personae corrumpat; sed iunge nos tibi efficaciter solius tuae gratiae dono, ut simus in te unum et in nullo deviemus a vero; quatenus in nomine tuo collecti, sic in cunctis teneamus cum modamine pietatis iustitiam, ut hic a te in nullo dissentiat sententia nostra, et in futuro pro bene gestis consequamur praemia sempiterna.

R. Amen.

2. Post actionem synodalem:

Antiphona: Confirma hoc Deus, quod operatus es in nobis, a templo sancto tuo, quod est in Ierusalem.

V. Benedicamus Patrem et Filium cum sancto Spiritu.

R. Laudemus et superexaltemus eum in saecula.

Oremus. Deus, apud quem pro perceptis donis gratitudo segura est alterius beneficii impetratio, da nobis dignas Tibi pro collatis beneficiis gratias rependere, ut misericordiam Tuam ad impertienda nobis nova bona provocemus. Per Christum Dominum nostrum. R. Amen.

Sequitur oratio ab omnibus recitanda:

Sub tuum praesidium confugimus — sancta Dei genitrix — nostras deprecationes ne despicias in necessitatibus nostris; sed a periculis cunctis — libera nos

semper — Virgo gloriosa et benedicta — Domina nostra —
— Mediatrix nostra — Advocata nostra — tuo Filio nos
reconcilia — tuo Filio nos commenda — tuo Filio nos
repraesenta.

Ÿ. Vultum tuum deprecabuntur.

R. Omnes divites plebis.

Oremus. Defende, quaesumus, Domine beata Maria
semper Virgine intercedente nostram ab omni adversitate
familiam, et toto corde Tibi prostratam ab hostium pro-
pitiis tuere clementer insidiis. Per Christum Dominum
nostrum.

R. Amen.

Ÿ. Divinum auxilium sit semper nobiscum.

R. Amen.

B) In Sessionibus publicis:

1. In Sessione primae diei:

*Pontifex ante faldistorium sibi paratum genuflexus,
deposita mitra, incipit schola prosequente Antiphonam:*

Exaudi nos Domine, quoniam benigna est miseri-
cordia tua, et secundum multitudinem miserationum tuarum
respice nos Domine.

*Incepto Psalmo, sedet Pontifex, accepta mitra, et sic
manet quousque finiatur Psalmus et Antiphona repetatur.*

Psalmus 68. Salvum me fac Deus: * quoniam
intraverunt aquae usque ad animam meam.

Infixus sum in limo profundi: * et non est substantia.

Veni in altitudinem maris * et tempestas demersit me.

Laboravi clamans, raucae factae sunt fauces meae! *
defecerunt oculi mei, dum spero in Deum meum.

Multiplicati sunt semper capillos capitis mei, * qui oderunt me gratis.

Confortati sunt, qui persecuti sunt me inimici mei iniuste: * quae non rapui, tunc exsolvebam.

Deus tu scis insipientiam meam: * et delicta mea a te non sunt abscondita.

Non erubescant in me, qui expectant te, Domine, * Domine virtutum.

Non confundantur super me: * qui quaerunt te, Deus Israel.

Quoniam propter te sustinui opprobrium: * operuit confusio faciem meam.

Extraneus factus sum fratribus meis, * et peregrinus filiis matris meae.

Quoniam zelus domus tuae comedit me: * et opprobria exprobrantium tibi ceciderunt super me.

Et operui in ieiunio animam meam; * et factum est in opprobrium mihi.

Et posui vestimentum meum cilicium: * et factus sum illis in parabolam.

Adversum me loquebantur, qui sedebant in porta: * et in me psallebant, qui bibebant vinum.

Ego vero orationem meam ad te Domine: * tempus beneplaciti Deus.

In multitudine misericordiae tuae exaudi me, * in veritate salutis tuae.

Eripe me de luto, ut non infigar, * libera me ab iis, qui oderunt me, et de profundis aquarum.

Non me demergat tempestas aquae, neque absorbeat me profundum: * neque urgeat super me puteus os suum.

Exaudi me Domine, quoniam benigna est misericordia tua: * et secundum multitudinem miserationum tuarum respice in me.

Et ne avertas faciem tuam a puero tuo: * quoniam tribulor, velociter exaudi me.

Intende animae meae, et libera eam: * propter inimicos meos eripe me.

Tu scis improperium meum et confusionem meam, * et reverentiam meam.

In conspectu tuo sunt omnes, qui tribulant me: * improperium expectavit cor meum et miseriam.

Et sustinui, qui simul constrictaretur, et non fuit: * et qui consolaretur, et non inveni.

Et dederunt in escam meam fel: * et in siti mea potaverunt me aceto.

Fiat mensa eorum coram ipsis in laqueum, * et in retributiones et in scandalum.

Obscurentur oculi eorum, ne videant: * et dorsum eorum semper incurva.

Effunde super eos iram tuam: * et furor irae tuae comprehendat eos.

Fiat habitatio eorum deserta: * et in tabernaculis eorum non sit, qui inhabitet.

Quoniam quem tu percussisti, persecuti sunt: * et super dolorem vulnerum meorum addiderunt.

Appone iniquitatem super iniquitatem eorum: * et non intret in iustitiam tuam.

Deleantur de libro viventium: et cum iustis non scribantur.

Ego sum pauper et dolens: * salus tua Deus suscepit me.

Laudabo nomen Dei cum cantico: * et magnificabo eum in laude.

Et placebit Deo super vitulum novellum, * cornua producentem et ungulas.

Videant pauperes et laetentur: * quaerite Deum, et vivet anima vestra.

Quoniam exaudivit pauperes Dominus: * et vinctos suos non despexit.

Laudent illum coeli et terra, * mare et omnia reptilia in eis.

Quoniam Deus salvam faciet Sion: * et aedificabuntur civitates Iuda.

Et inhabitabunt ibi, * et haereditate acquirent eam.

Et semen servorum eius possidebit eam: * et qui diligunt nomen eius, habitabunt in ea.

Gloria Patri etc. Sicut erat etc.

Finito Psalmo et repetita Antiphona, Pontifex surgit, et deposita mitra, versus ad altare dicit:

Adsumus, Domine sancte Spiritus, adsumus peccati quidem immanitate detenti, sed in nomine tuo specialiter aggregati: veni ad nos, adesto nobis, dignare illabi cordibus nostris: doce nos, quid agamus; quo gradiamur, ostende; quid efficiamus, operare. Esto solus et suggestor et effector iudiciorum nostrorum, qui solus cum Deo Patre et eius Filio nomen possides gloriosum: non nos patiaris perturbatores esse iustitiae, qui summe diligis aequitatem; ut sinistrum nos non ignorantiae trahat; non favor inflectat; non acceptio muneris vel personae corrumpat: sed iunge nos tibi efficaciter solius tuae gratiae dono, ut simus in te unum, et in nullo deviemus a vero; quatenus in nomine tuo collecti, sic et cunctis teneamus cum moderamine

pietatis iustitiam, ut hic a te in nullo dissentiat sententia nostra, et in futuro pro bene gestis consequamur praemia sempiterna.

Respondetur ab omnibus: Amen.

Oremus. Omnipotens sempiterne Deus, qui misericordia tua nos incolumes in hoc loco specialiter aggregasti; mentes nostras, quaesumus, Paraclitus, qui a te procedit, illuminet et inducat in omnem, sicut tuus promisit Filius, veritatem; cunctosque in tua fide et charitate corroboraret; ut excitati a temporali synodo, proficiamus ad aeternae felicitatis augmentum. Per eundem Dominum nostrum Iesum Christum Filium tuum: qui tecum vivit et regnat in unitate eiusdem Spiritus sancti Deus, per omnia saecula saeculorum. R. Amen.

Finita oratione Pontifex, accepta mitra, procumbit supra faldistorium praedictum, aliis omnibus genuflectentibus, et dicuntur Litaniae:

Kyrie eleison. Christe eleison.

Kyrie eleison. Christe, audi nos.

Christe, exaudi nos.

Pater de coelis Deus, Miserere nobis.

Fili Redemptor mundi Deus, Miserere nobis.

Spiritus sancte Deus, Miserere nobis.

Sancta Trinitas unus Deus, Miserere nobis.

Sancta Maria,

Sancta Dei genitrix,

Sancta Virgo virginum,

Sancte Michael,

Sancte Gabriel,

Sancte Raphael,

} Ora pro nobis.

Omnes ss. Angeli et Archangeli, Orate pro nobis.

Omnes sancti beatorum spirituum ordines, Orate pro nobis.

Sancte Ioannes Baptista, Ora pro nobis.

Sancte Ioseph, Ora pro nobis.

Omnes sancti Patriarchae et Prophetæ, Orate pro nobis.

Sancte Petre,

Sancte Paule,

Sancte Andrea,

Sancte Iacobe,

Sancte Ioannes,

Sancte Thoma,

Sancte Iacobe,

Sancte Philippe,

Sancte Bartholomæe,

Sancte Matthæe,

Sancte Simon,

Sancte Thaddæe,

Sancte Mathia,

Sancte Barnaba,

Sancte Luca,

Sancte Marce,

Ora pro nobis.

Omnes sancti Apostoli et Evangelistæ, Orate pro nobis.

Omnes sancti Discipuli Domini,

Omnes sancti Innocentes,

Ora pro nobis.

Sancte Stephane,

Sancte Laurenti,

Sancte Vincenti,

Ora pro nobis.

Sancti Fabiane et Sebastianæ,

Sancti Ioannes et Paule,

Sancti Cosma et Damiane,

Sancti Gervasi et Protasi,

Omnes sancti Martyres,

Ora pro nobis.

Sancte Silvester,
 Sancte Gregori,
 Sancte Ambrosi,
 Sancte Augustine,
 Sancte Hieronyme,
 Sancte Martine,
 Sancte Nicolae,

}

Ora pro nobis.

Omnes sancti Pontifices et Confessores, Orate pro nobis.

Omnes sancti Doctores, Orate pro nobis.

Sancte Benedicte,
 Sancte Antoni,
 Sancte Bernarde,
 Sancte Dominice,
 Sancte Francisce,

}

Ora pro nobis.

Omnes sancti Sacérdotes et Levitae, Orate pro nobis.

Omnes sancti Monachi et Eremitae, Orate pro nobis.

Sancta Maria Magdalena,
 Sancta Agatha,
 Sancta Lucia,
 Sancta Agnes,
 Sancta Caecilia,
 Sancta Catharina,
 Sancta Anastasia,

}

Ora pro nobis.

Omnes sanctae Virgines et Viduae, Orate pro nobis.

Omnes Sancti et Sanctae Dei, Intercedite pro nobis.

Propitius esto, Parce nobis Domine.

Propitius esto, Exaudi nos Domine.

Ab omni malo,
 Ab omni peccato,
 Ab ira tua,
 A flagello terraemotus,

}

Libera nos
 Domine.

A subitanea et improvisa morte, Libera nos Domine.

Ab insidiis diaboli, Libera nos Domine.

Ab ira et odio et omni mala voluntate, Libera nos Domine.

A spiritu fornicationis, Libera nos Domine.

A fulgure et tempestate, Libera nos Domine.

Per mysterium sanctae Incarnationis tuae, Libera nos Domine.

Per Adventum tuum, Libera nos Domine.

Per Nativitatem tuam, Libera nos Domine.

Per Baptismum et sanctum Ieiunium tuum, Libera nos Domine.

Per Crucem et Passionem tuam, Libera nos Domine.

Per Mortem et Sepulturam tuam, Libera nos Domine.

Per sanctam Resurrectionem tuam, Libera nos Domine.

Per admirabilem Ascensionem tuam, Libera nos Domine.

Per Adventum Spiritus sancti Paracliti, Libera nos Domine.

In die Iudicii, Libera nos Domine.

Peccatores, Te rogamus audi nos.

Ut nobis parcas, Te rogamus audi nos.

Ut nobis indulgeas, Te rogamus audi nos.

Ut ad veram poenitentiam nos perducere digneris, Te rogamus audi nos.

Ut Ecclesiam tuam sanctam regere et conservare digneris, Te rogamus audi nos.

Ut domnum Apostolicum et omnes Ecclesiasticos ordines in sancta religione conservare digneris, Te rogamus audi nos.

Ut inimicos sanctae Ecclesiae humiliare digneris, Te rogamus audi nos.

Ut Regibus et Principibus Christianis pacem et veram concordiam donare digneris, Te rogamus audi nos.

Ut cuncto populo christiano pacem et unitatem largiri digneris, Te rogamus audi nos.

Ut nosmetipsos in tuo sancto servitio confortare et conservare digneris, Te rogamus audi nos.

Ut mentes nostras ad coelestia desideria erigas, Te rogamus audi nos.

Ut omnibus benefactoribus nostris sempiterna bona retribuas, Te rogamus audi nos.

Ut animas nostras, fratrum, propinquorum et benefactorum nostrorum ab aeterna damnatione eripias, Te rogamus audi nos.

Ut fructus terrae dare et conservare digneris, Te rogamus audi nos.

Pontifex surgit, et baculum pastorem in sinistra tenens, stans versus ad Synodum, dicit:

Ut hanc praesentem Synodum visitare, disponere et bene † dicere digneris.

R. Te rogamus audi nos.

Producens signum crucis pariter super omnes, quo facto, iterum occumbit, Litanis perficiendis.

Ut nos exaudire digneris, Te rogamus audi nos.

Fili Dei, Te rogamus audi nos.

Agnus Dei, qui tollis peccata mundi, Parce nobis Domine.

Agnus Dei, qui tollis peccata mundi, Exaudi nos Domine.

Agnus Dei, qui tollis peccata mundi, Miserere nobis.

Christe, audi nos. Christe, exaudi nos.

Kyrie eleison. Christe eleison. Kyrie eleison.

Quibus dictis, surgunt omnes, et Pontifex deposita mitra dicit stans versus ad altare: Oremus.

Et ministri: Flectamus genua. R. Levate.



Da, quaesumus, Ecclesiae tuae, misericors Deus, ut Spiritu sancto congregata, secura tibi devotione servire mereatur. Per Dominum nostrum Iesum Christum Filium tuum: qui tecum vivit et regnat in unitate eiusdem Spiritus sancti Deus, per omnia saecula saeculorum. R. Amen.

Deinde Pontifex, accepta mitra, ascendit ad sedem sibi paratam in plano altaris, ita ut in ea sedens dorsum suum vertat ad altare. Et imponit incensum in thuribulum, et benedicit more solito. Diaconus dalmatica indutus, praecedentibus thuriferario et duobus Ceroferariis et Subdiacono tunicella induto, paramentis rubeis, benedictione accepta a Pontifice, cantat in loco convenienti:

Sequentia sancti Evangelii secundum Lucam.

In illo tempore: Convocatis Iesus duodecim Apostolis dedit illis virtutem et potestatem super omnia daemonia, et ut languores curarent. Et misit illos, praedicare regnum Dei et sanare infirmos. Et ait ad illos: Nihil tuleritis in via, neque virgam, neque peram, neque panem, neque pecuniam, neque duas tunicas habeatis. Et in quamcunque domum intraveritis, ibi manete, et inde ne exeatis. Et quicumque non receperint vos, exeuntes de civitate illa, etiam pulverem pedum vestrorum excutite in testimonium super illos. Egressi autem circuibant per castella evangelizantes et curantes ubique.

Quo finito, liber Evangeliorum apertus per Subdiaconum portatur Pontifici per eum osculandus, qui et deinde incensatur. Quo facto, Pontifex ipse ante sedem suam praedictam, deposita mitra, versus ad altare, atque alii omnes in locis suis genuflectunt. Tum Pontifex sic genuflexus incipit cantando, schola prosequente hymnum:

Veni creator Spiritus, mentes tuorum visita: * imple superna gratia, quae tu creasti pectora.

Finito primo versu, Pontifex surgit, stans versus ad altare, sine mitra, usque ad finem hymni: similiter omnes alii cum Pontifice surgunt.

Qui diceris Paraclitus, altissimi donum Dei: * fons vivus, ignis, charitas et spiritalis unctio.

Tu septiformis munere, digitus Paternae dexteræ:
* Tu rite promissum Patris, sermone ditans guttura.

Accende lumen sensibus, infunde amorem cordibus,
* infirma nostri corporis virtute firmans perpeti.

Hostem repellas longius, pacemque dones protinus; * ductore sic te praevio, vitemus omne noxium.

Per te sciamus da Patrem, noscamus atque Filium:
* teque utriusque Spiritum credamus omni tempore.

Deo Patri sit gloria, et Filio, qui a mortuis * surrexit ac Paraclito, in saeculorum saecula. Amen.

2. In Sessione secundae diei:

Pontifex, paratus ut supra, procedit coram altari Diacono et Subdiacono, paratis ut supra, ipsum associantibus, et ibi in faldistorio ante medium altaris iuxta inferiorem gradum sibi parato genuflexus, deposita mitra, inchoat, schola prosequente, Antiphonam.

Propitius esto peccatis nostris Domine, ne quando dicant gentes: Ubi est Deus eorum?

Finita Antiphona et incepto Psalmo, sedet Pontifex, reasumta mitra, usque ad finem Psalmi.

Psalmus 78. Deus, venerunt gentes in haereditatem tuam, polluerunt templum sanctum tuum: * posuerunt Ierusalem in pomorum custodiam.

Posuerunt morticina servorum tuorum escas volatilibus coeli: * carnes sanctorum tuorum bestiis terrae.

Effuderunt sanguinem eorum tamquam aquam in circuitu Ierusalem: * et non erat, qui sepeliret.

Facti sumus opprobrium vicinis nostris: * subsanatio et illusio his, qui in circuitu nostro sunt.

Usquequo Domine irasceris in finem: * accendetur velut ignis zelus tuus?

Effunde iram tuam in gentes, quae te non noverunt; * et in regna, quae nomen tuum non invocaverunt.

Quia comederunt Iacob: * et locum eius desolaverunt.

Ne memineris iniquitatum nostrarum antiquarum, cito anticipe nos misericordiae tuae: * quia pauperes facti sumus nimis.

Adiuva nos Deus salutaris noster, et propter gloriam nominis tui Domine libera nos: * et propitius esto peccatis nostris propter nomen tuum.

Ne forte dicant in gentibus: Ubi est Deus eorum? * et innotescat in nationibus coram oculis nostris.

Ultio sanguinis servorum tuorum, qui effusus est: * introeat in conspectu tuo gemitus compeditorum.

Secundum magnitudinem brachii tui, * posside filios mortificatorum.

Et redde vicinis nostris septuplum in sinu eorum: * improprium ipsorum, quod exprobraverunt tibi Domine.

Nos autem populus tuus et oves pascuae tuae: * confitebimur tibi in saeculum.

In generationem et generationem: * annuntiabimus laudem tuam.

Gloria Patri et Filio etc. Sicut erat in principio etc.

Deinde finito Psalmo et repetita Antiphona, Pontifex deposita mitra surgit, et stans versus ad altare dicit:

Oremus. Nostrorum tibi, Domine, curvantes genua cordium, quaesumus, ut bonum, quod in nobis a te requiritur, exequamur: scilicet, ut prompta tecum sollicitudine gradientes, discretionis arduae subtile iudicium faciamus: ac misericordiam diligentes, clareamus studiis tibi placitae actionis. Per Christum Dominum nostrum. R. Amen.

Oremus. Mentibus nostris, quaesumus Domine, Spiritum sanctum benignus infunde, quatenus in nomine tuo collecti, sic in cunctis teneamus cum moderamine pietatis iustitiam, ut hic a te in nullo dissentiat voluntas nostra, sed semper rationabilia meditantes, quae tibi sunt placita, et dictis exequamur et factis. Per Dominum nostrum Iesum Christum Filium tuum; qui tecum vivit et regnat in unitate eiusdem Spiritus sancti Deus, per omnia saecula saeculorum. R. Amen.

Oremus.

Et ministri dicunt: Flectamus genua.

R. Levate.

Deus, qui nos iustitiam loqui, et quae recta sunt, praecipis iudicare: tribue nobis, ut neque iniquitas in ore nec pravitas inveniatur in mente: ut puro cordi purior sermo consentiat, ostendatur in opere iustitia, neque appareat dolus in lingua, sed ex corde veritas proferatur. Per Dominum nostrum Iesum Christum Filium tuum: Qui tecum vivit et regnat in unitate Spiritus sancti Deus, per omnia saecula saeculorum. R. Amen.

Post haec Pontifex, accepta mitra, ascendit ad planum altaris, et sedet in sede seu faldistorio ibidem sibi parato.

Tum accedit Diaconus cum thuriferario, et Pontifex imponit incesum; deinde Diacono benedicit, qui procedens ad locum consuetum signat, incensat et cantat Evangelium, ut heri, Pontifice ante sedem praedictam sine mitra, verso ad Diaconum, stante.

Sequentia sancti Evangelii secundum Lucam.

In illo tempore: Designavit Dominus et alios septuaginta duos: et misit illos binos ante faciem suam in omnem civitatem et locum, quo erat ipse venturus. Et dicebat illis: Messis quidem multa, operarii autem pauci. Rogate ergo dominum messis, ut mittat operarios in messem suam. Ite: ecce, ego mitto vos sicut agnos inter lupos. Nolite portare sacculum, neque peram, neque calceamenta, et neminem per viam salutaveritis. In quaecumque domum intraveritis, primum dicite: Pax huic domui: et si ibi fuerit filius pacis, requiescet super illum pax vestra: sin autem, ad vos revertetur. In eadem autem domo manete edentes et bibentes, quae apud illos sunt: dignus est enim operarius mercede sua. Nolite transire de domo in domum. Et in quaecumque civitatem intraveritis, et susceperint vos, manducate, quae apponuntur vobis: et curate infirmos, qui in illa sunt, et dicite illis: Appropinquavit in vos regnum Dei.

Quo finito, et per Pontificem libro osculato, et ipso incensato, Pontifex sine mitra ante sedem praedictam versus ad altare, ac aliis omnibus in suis locis genuflexis, incipit schola prosequente, hymnum: Veni Creator Spiritus. Et dicitur totus, ut supra pag. 35, quem schola prosequitur, ut in primo die. Finito primo versu, Pontifex surgit, stans versus ad altare, detecto capite usque ad finem hymni. Simili modo faciunt omnes alii.

3. In Sessione tertiae diei:

a) Ante Sessionem.

Pontifex paratur, ut heri, assistantibus sibi Diacono et Subdiacono paratis, geneflexus in faldistorio iuxta inferiorem gradum ante medium altaris sibi parato, deposita mitra, incipit, schola prosequente, Antiphonam.

Exaudi nos Domine, quoniam benigna est misericordia tua: et secundum multitudinem miserationum tuarum respice nos Domine.

Psalmus: Salvum me fac Deus: * quoniam intraverunt aquae usque ad animam meam. *Et dicitur totus, prout habetur supra in primo die pag. 25. Deinde repetitur Antiphona. Incepto Psalmo, Pontifex sedet, et accipit mitram sic manens, quousque Psalmus finiatur et Antiphona repetatur; qua repetita, deposita mitra, surgit, et stans versus ad altare, dicit:*

Oremus. Ad te, Domine, interni clamoris vocibus proclamantes, unanimiter postulamus, ut respectu tuae gratiae solidati, praecones veritatis efficiamur intrepidi, tuumque valeamus verbum cum omni fiducia loqui. Per Dominum nostrum Iesum Christum Filium tuum: qui tecum vivit et regnat in unitate Spiritus sancti Deus, per omnia saecula saeculorum.

R. Amen.

Oremus. Omnipotens sempiterne Deus, qui sacro verbi tui oraculo promisisti: Ubi duo vel tres in nomine tuo congregati essent, te medium fore; adesto coetui nostro propitius, et cor nostrum illumina misericors, ut a bono misericordiae tuae nullatenus aberremus, sed rectum iu-

stitiae tuae tramitem in omnibus teneamus. Per Dominum nostrum Iesum Christum Filium tuum: qui tecum vivit et regnat in unitate Spiritus sancti Deus, per omnia saecula saeculorum. R. Amen.

Oremus.

Et ministri dicunt: Flectamus genua.

R. Levate.

Deus, qui populis tuis et indulgentia consulis et amore dominaris; da spiritum sapientiae tuae, quibus dedisti regimen disciplinae; ut de profectu sanctarum ovium fiant gaudia aeterna pastorum. Per Dominum nostrum Iesum Christum Filium tuum: qui tecum vivit et regnat in unitate eiusdem Spiritus sancti Deus, per omnia saecula saeculorum. R. Amen.

Post haec Pontifex, accepta mitra, ascendit ad platum altaris, sedens in sede, seu faldistorio ibidem sibi parato. Tum accedit Diaconus cum thuriferario, et Pontifex imponit incensum; deinde benedicit Diacono, qui procedens ad locum consuetum signat, incensat et cantat Evangelium, ut heri, Pontifice ante sedem praedictam sine mitra, verso ad Diaconum, stante.

Sequentia sancti Evangelii secundum Matthaeum.

In illo tempore dixit Iesus discipulis suis: Si peccaverit in te frater tuus, vade et corripe eum inter te et ipsum solum; si te audierit, lucratus eris fratrem tuum. Si autem te non audierit, adhibe tecum adhuc unum vel duos, ut in ore duorum vel trium testium stet omne verbum. Quod si non audierit eos: dic Ecclesiae. Si autem Ecclesiam non audierit, sit tibi sicut ethnicus et publicanus.

Amen dico vobis, quaecumque alligaveritis super terram, erunt ligata et in coelo: et quaecumque solveritis super terram, erunt soluta et in coelo. Iterum dico vobis: quia si duo ex vobis consenserint super terram, de omni re, quaecumque petierint, fiet illis a Patre meo, qui in coelis est. Ubi enim sunt duo vel tres congregati in nomine meo, ibi sum in medio eorum. Tunc accedens Petrus ad eum dixit: Domine, quoties peccabit in me frater meus, et dimittam ei? usque septies? Dicit illi Iesus: Non dico tibi usque septies: sed usque septuagies septies.

Quo finito, et per Pontificem libro osculato, et ipso incensato, Pontifex sine mitra ante sedem praedictam versus ad altare, atque aliis omnibus in locis suis genuflexis, incipit schola prosequente hymnum: Veni Creator Spiritus. Et dicitur totus, ut supra pag. 35. Finito primo versu, Pontifex surgens, stat versus ad altare, detecto capite usque ad finem hymni. Simili modo faciunt omnes alii. Expleto hymno omnes sedent. Pontifex sedens cum mitra Synodum his verbis alloquitur, si velit:

Venerabiles et dilectissimi fratres. Convenit, ut ea, quae ecclesiasticis officiis et sacerdotalibus gradibus, vel etiam canonicis sanctionibus propter diversas occupationes, aut (quod negare non possumus) propter nostram aliorumque desidiam, non tam plene, ut oportet, executae sunt: omnium nostrum unanimi consensu et voluntate requirantur, et humiliter coram charitate vestra recitentur: ut quae digna sunt emendatione, ad meliorem statum, auxiliante Domino, perducantur. Et cui fortasse aliquid quod digestum est, displicet, charitati vestrae cum benignitate et modestia intimare non differat; quatenus totum, quod synodali conventionem nostra statutum fuerit vel renovatum,

absque omni contrarietate, concordia sanctae pacis ab omnibus aequè custodiatur ac teneatur, ad augmentum aeternae beatitudinis omnium nostrum.

b) Oratio post Sessionem finalem.

Oremus. Nulla est, Domine, humanae conscientiae virtus, quae inoffense possit tuae voluntatis iudicia experiri, et ideo, quia imperfectum nostrum vident oculi tui, perfectioni deputa misericors Deus, quod perfecto aequitatis fine concludere peroptamus; te in nostris principiis occurrentem poposcimus, te in hoc fine iudiciorum nostrorum indultorem nostris excessibus speramus, scilicet, ut ignorantiae parcas, errori indulgeas, ut perfectis votis perfectam operis efficaciam largiaris: et quia conscientia remordente, tabescimus, ne aut ignorantia nos traxerit in errorem, aut praeceps forsitan voluntas impulerit, iustitiam declinare; hoc te poscimus, te rogamus, ut si quid offensionis in hac Synodi celebritate contraximus, te miserante, indulgentiam sentiamus: ut in eo, quod soluturi sumus aggregatam Synodum, a cunctis primum absolvamur nostrorum nexibus delictorum; qualiter et transgressores venia et confitentes tibi subsequatur remuneratio sempiterna. Per Christum Dominum nostrum.

R. Amen.



Ad sacratissimum Cor Iesu formula
consecrationis recitanda.

Iesu dulcissime, redemptor humani generis, respice nos ad altare tuum humillime provolutos. Tui sumus, tui esse volumus; quo autem tibi coniuncti firmitus esse pos-

simus, en hodie sacratissimo Cordi tuo se quisque nostrum sponte dedicat.

Te quidem multi novere numquam: Te, spretis mandatis tuis, multi repudiarunt. Miserere utrorumque, benignissime Iesu, atque ad sanctum Cor tuum rape universos. Rex esto, Domine, nec fidelium tantum, qui nullo tempore discessere a te, sed etiam prodigorum filiorum, qui te reliquerunt: fac hos, ut domum paternam cito repetant, ne miseria et fame pereant. Rex esto eorum, quos aut opinionum error deceptos habet, aut discordia separatos, eosque ad portum veritatis atque ad unitatem fidei revoca, ut brevi fiat unum ovile et unus pastor.

Rex esto denique eorum omnium, qui in vetere gentium superstitione versantur, eosque e tenebris vindicare ne renuas in Dei lumen et regnum. Largire, Domine, Ecclesiae tuae securam cum incolumitate libertatem; largire cunctis gentibus tranquillitatem ordinis: perfice, ut ab utroque terrae vertice una resonet vox: Sit laus divino Cordi, per quod nobis parta salus, ipsi gloria et honor in saecula! Amen. ¹

Ÿ. Iesu, mitis et humilis Corde.

R. Fac cor nostrum secundum Cor tuum.

Oremus.

Omnipotens sempiternae Deus, respice in Cor dilectissimi Filii tui, et in laudes et satisfactiones, quas in nomine peccatorum tibi persolvit, iisque misericordiam tuam petentibus Tu veniam concede placatus, in nomine

¹ Ex encyclica *Annum sacrum*, data die 25. Maii 1899, de hominibus sacratissimo Cordi Iesu devovendis.

eiusdem Filii tui Iesu Christi, qui tecum vivit et regnat in unitate Spiritus sancti Deus, per omnia saecula saeculorum. Amen.¹



Acclamationes in fine Synodi faciendae.

Ex instructione Caeremonialis Romani acclamationes in Synodis dioecesanis parcius sunt adhibendae. Propterea in Synodo prima et secunda Lavantina sic dicta suffragia in sessione Synodi finali persoluta sunt. Cum hucusque igitur acclamationes nondum sint adhibitae, dignum et iustum erit, eiusmodi iubilationes in una saltem eaque tertia Synodo, Christo Deohomini viventi, regnanti et imperanti sacra atque anno iubilaes habitae, decantare.

*Absoluta sessione synodali ultima recitat Pontifex orationem: **Nulla est Domine**, prout supra pag. 42 prostat. Qua persoluta Secretarius Synodi indilate procedit ad altare et conversus ad Synodales, stante Episcopo in throno, alta et sonora voce decantat singulas acclamationes et adstantes simili concentu respondent ordine sequenti:*

Acclam. Genitori et Genito et ab utroque Procedenti gloria et laus et honor in saeculorum saecula!

Respon. Benedicamus Patrem et Filium cum sancto Spiritu! Laudemus et superexaltemus Eum in saecula!

Acclam. Christo Deohomini, salvatori regique mundi, cui Synodus haec est consecrata, eius Cordi dulcissimo

¹ Versiculus, Responsorium et Oratio ex Decreto Urbis et Orbis de die 2. Aprilis 1899, cuius vigore Litaniae Sacratissimi Cordis Iesu indulgentiis (tercentum Dierum) auctae ubique terrarum publice recitari et decantari in posterum valent.

adoratio et homagium, claritas et virtus, honores et laudes in aeternum!

Respon. Quoniam tu solus sanctus, tu solus Dominus, tu solus altissimus, Iesu Christe! Dignus est agnus, qui pro nobis occisus est, accipere benedictionem et honorem et potestatem in saecula saeculorum! Adoramus te, Christe, et benedicimus tibi, quia per crucem tuam redemisti mundum!

Acclam. Virgini Deiparae, suavissimae matri nostrae Mariae, auxilio christianorum, amor et meritis cultus!

Respon. Salve regina, mater misericordiae, vita, dulcedo et spes nostra, salve!

Acclam. Sancto Michaeli archangelo, principi militiae coelestis, angelisque tutelaribus, beato Ioanni Baptistae patrono ecclesiae cathedralis, sancto Ioseph tutori terrae Styriacae, sancto apostolo Andreae protectori almae nostrae dioeceseos, cunctisque sanctis coelitibus, quorum patrocinio gaudent ecclesiae dioecesanae, iugis veneratio et supplicatio!

Respon. Defensoribus nostris potentibus veneratio et supplicatio et gratitudo perennis!

Acclam. Beatissimo Patri, gloriose regnanti Papae Leoni XIII., luminari magno, per constitutiones suas egregias totum terrarum orbem irradianti clareque colustranti, nec non celebratori magni et universalis Iubilaei plenus plausus et triumphus, victoria et immortalis memoria!

Respon. Clementissimo Patri et Principi christianorum, magistro infallibili, ovium et agnorum pastori, clavigero divino filialis pietas, reverentialis devotio, obedientia, constans adhaesio universorum!

Acclam. Sacrorum antistiti nostro Michaeli, huiusce et prioris Synodi constitutori, pro singulari vigilantia et indefessa in pietate et sacris scientiis promovendis sollicitudine¹ magnae gratiae et a Deo retributio!

¹ Appositiones depromptae ex litteris gratulatoriis de die 26. Octobris 1899, quarum tenor hic est:

Celsissimo ac Reverendissimo Domino Domino *Michaeli Napotnik*, Principi-Episcopo Lavantino etc. etc.

Altare Sanctissimo Cordi Iesu in Ecclesia cathedrali dedicatum consecranti pro immensis laboribus decennio episcopatus peractis ac pro singulari vigilantia et indefessa in pietate et sacris scientiis promovendis sollicitudine Capitulum cathedrale Clerusque Lavantinus intimas agit gratias Deumque Optimum Maximum precatur, ut sit Pastori et gregi Ei adhaerenti dux et via ad per dilectum Cor Sanctissimi Salvatoris. Marburgi, die 26. Octobris 1899.

Ig. Orožen, Praep. cap. — Laurentius Herg, Dec. cap. — Dr. Joan. Krizanič, Can. Sen. — Philippus Jacobus Bohinc, eccl. cathedral. Parochus et Canonicus. — Car. Hribovšek, Can. cap. — Dr. Jos. Pajek, Can. cap. — Dr. Joan. Mlakar, Can. cap. — Joannes Bosina, Decanus Drachenburgensis. — Thomas Rožanc, Decanus Marburgensis. — Antonius Hajšek, Decanus Šlavo-Bistricensis. — Franciscus Ogradi, Abbas Celeiensis. — Josephus Fleck, Praepositus Petov. et Decanus. — M. Stoklas, Decanus Braslovč. — Bartholom. Voh, Decan. Gonovicen. — Jakob Caf, Parochus et Decanus in Sv. Tomaž-Vel. Nedelja. — Franciscus Jug, Parochus et Decanus Samariensis. — Joannes Skuhala, Parochus et Decanus Luttenbergensis. — Ant. Šlander, Decanus Veteroforensis. — Jos. Čížek, Decanus Jareninae. — Jos. Jurčič, Decanus St. Leonard. in coll. — Dr. Leopoldus Gregorec, Canonicus, Decanus Neoecclesiensis. — Franc. Dovnik, Decanus Gornji grad. — Franc. Šalamon, Archipar. et Decanus Rogatiensis. — Franciscus Hrastel, Parochus et Administrator decanatus Saldenhofensis. — Josephus Kralj, Decanus in Sauritsch. — Jacobus Lempl, Decanus in Schallthal. — Joannes Ev. Žuža, Decanus Tyberiensis. — Henricus Verk, Decanus Videmsis. — Augustinus Hecel, Decanus Marenbergensis. — Pro aegroto Martino Strajnsčak, Decano Camp. Dravensis, L. Herg, Decanus cap.

Respon. Magnae gratiae, lenimen cordis, gaudium in pace, prosperitas ad plurimos annos! Deus optimus maximus eum propitius respiciat detque ei, ut ad vitam unacum grege sibi credito perveniat sempiternam!

Acclam. Gloriosissimo nostro imperatori et regi apostolico Francisco Iosepho Primo, semper Augusto, septem decades vitae celebranti, publicae pacis auctori, iustitiae vindici, patri pauperum nec non Augustissimae Domui et inclytae Dynastiae Caesareae pax a Deo, imperium securum, vita prolixa, perpetua felicitas!

Respon. Suae caesareae et regiae apostolicae Maiestati pax a Deo, diuturna incolumitas, illibata felicitas! Rex regum et Dominus dominantium salvum faciat imperatorem nostrum Franciscum Iosephum et ab omnibus tueatur adversis, quatenus et ecclesiasticae pacis obtineat tranquillitatem et post huius temporis decursum ad aeternam perveniat haereditatem!

Acclam. Reverendissimo ecclesiae cathedralis Capitulo, semper fideli senatui ac coronae Praesulis, providis officialibus, qui ad sanctum hoc opus suam opem contulerunt, honorandis Dominis decanis, venerandis parochis ac venerabilibus capellanis omnibusque viris ecclesiasticis, saecularibus et regularibus, in speciosa vinea Domini Lavantina excolenda operantibus, benedictio et salus, felix ad greges et ecclesias reditus, plurimi cum exultatione messis manipuli, vitae sanctitas et felicitas in Deo!

Respondet solus Episcopus. Operariis indefessis in agro Domini Lavantino benedictio et salus, anni multi et felices, merces copiosa, aeterna remuneratio! Episcopus et

pastor animarumstrarum, Iesus Christus, coronet omnes et singulos immarcescibili corona vitae!

Acclam. Civitati Marburgensi et omnibus civibus eius pax vera atque divinarum gratiarum abundantia! In Deo dilecto dioecesis probo populo salus, animorum concordia, in vera fide perseverantia, laetitia et consolatio in Spiritu sancto et omnigena felicitas!

Respon. Omni benedictione coelesti et gratia repletur a divino bono Pastore religiosus grex Lavantinus!

Acclam. Omnibus episcopis Lavantinis, inprimis Antonio Martino, translatori sedis episcopalis, et Iacobo Maximiliano, munificentissimo seminarii minoris benefactori, cunctisque sacerdotibus et clericis, saecularibus et regularibus, nec non omnibus fidelibus dioecesanis, in Christo quiescentibus, lux perpetua et requies aeterna!

Respon. Requiem aeternam dona eis Domine et lux perpetua luceat eis!

Acclam. Modo finienda Synodus ad gloriam Iesu Christi, ad robur catholicae fidei morumque perfectionem, ad disciplinam emendandam ac firmandam Deo favente celebrata est: et nunc constitutionum feliciter peractae Synodi observantiam salutarem omnes, qui adsumus, unanimi voto a Deo bonorum omnium largitore intercedentibus Deigenitrice Maria Sanctisque omnibus humiliter imploramus!

Respon. Alleluia! Confirma hoc Deus, quod operatus est in nobis! Fiat! Amen. Amen!

Acclamationibus percantatis dat Episcopus benedictionem. Posthac vigore facultatis apostolicae impertitur in-

dulgentias plenarias. Quibus peractis Secretarius Synodi, stans iuxta Pontificem, dicit alta voce: Recedamus cum pace. Et respondent omnes: In nomine Christi.

Tunc omnes pariter surgentes, Pontificem ad ostium ecclesiae synodalis reducunt, inde reverendissimus Praesul redit in suum palatium episcopale. Sic omnia negotia Synodi expediuntur et conventio synodalis concluditur.



Forma professionis fidei.

Ego N. firma fide credo et profiteor omnia et singula, quae continentur in Symbolo fidei, quo sancta Romana Ecclesia utitur, videlicet: Credo in unum Deum, Patrem omnipotentem, factorem coeli et terrae, visibilium omnium et invisibilium. Et in unum Dominum Iesum Christum, Filium Dei unigenitum. Et ex Patre natum ante omnia saecula. Deum de Deo, lumen de lumine, Deum verum de Deo vero. Genitum, non factum, consubstantialem Patri, per quem omnia facta sunt. Qui propter nos homines, et propter nostram salutem descendit de coelis. Et incarnatus est de Spiritu sancto ex Maria virgine: et homo factus est. Crucifixus etiam pro nobis sub Pontio Pilato passus et sepultus est. Et resurrexit tertia die secundum Scripturas. Et ascendit in coelum; sedet ad dexteram Patris. Et iterum venturus est cum gloria iudicare vivos et mortuos; cuius regni non erit finis. Et in Spiritum sanctum Dominum, et vivificantem, qui ex Patre Filioque procedit. Qui cum Patre et Filio simul adoratur et conglorificatur:

qui locutus est per Prophetas. Et unam sanctam Catholicam et Apostolicam Ecclesiam. Confiteor unum baptisma in remissionem peccatorum. Et exspecto resurrectionem mortuorum. Et vitam venturi saeculi. Amen.

Apostolicas et Ecclesiasticas traditiones, reliquasque eiusdem Ecclesiae observationes et constitutiones firmissime admitto et amplector. Item sacram Scripturam iuxta eum sensum, quem tenuit et tenet sancta mater Ecclesia, cuius est iudicare de vero sensu et interpretatione sacrarum Scripturarum, admitto; nec eam unquam nisi iuxta unanimem consensum Patrum accipiam et interpretabor.

Profiteor quoque, septem esse vere et proprie Sacramenta novae legis, a Iesu Christo Domino nostro instituta, atque ad salutem humani generis, licet non omnia singulis necessaria, scilicet Baptismum, Confirmationem, Eucharistiam, Poenitentiam, Extremam Unctionem, Ordinem et Matrimonium; illaque gratiam conferre, et ex his Baptismum, Confirmationem et Ordinem sine sacrilegio reiterari non posse. Receptos quoque et approbatos Ecclesiae Catholicae ritus, in supradictorum omnium Sacramentorum sollemni administratione recipio et admitto; omnia et singula, quae de peccato originali et de iustificatione in sacrosancta Tridentina Synodo definita et declarata fuerunt, amplector et recipio.

Profiteor pariter, in Missa offerri Deo verum, proprium et propitiatorium sacrificium, pro vivis et defunctis; atque in sanctissimo Eucharistiae Sacramento esse vere, realiter et substantialiter corpus et sanguinem una cum anima et divinitate Domini nostri Iesu Christi, fierique conversionem totius substantiae panis in corpus et totius

substantiae vini in sanguinem, quam conversionem Catholica Ecclesia Transubstantiationem appellat. Fateor etiam, sub altera tantum specie totum atque integrum Christum, verumque Sacramentum sumi.

Constanter teneo, Purgatorium esse animasque ibi detentas fidelium suffragiis iuari. Similiter et Sanctos una cum Christo regnantes, venerandos atque invocandos esse, eosque orationes Deo pro nobis offerre, atque eorum reliquias esse venerandas. Firmissime assero, imagines Christi ac Deiparae semper virginis nec non aliorum Sanctorum habendas et retinendas esse, atque eis debitum honorem ac venerationem impertiendam. Indulgentiarum etiam potestatem a Christo in Ecclesia relictam fuisse, illarumque usum Christiano populo maxime salutarem esse affirmo. Sanctam Catholicam et Apostolicam Romanam Ecclesiam omnium Ecclesiarum matrem et magistram agnosco; Romanoque Pontifici, beati Petri Apostolorum principis successori ac Iesu Christi Vicario, veram obedientiam spondeo ac iuro. Cetera item omnia a sacris Canonibus et oecumenicis Conciliis ac praecipue a sacrosancta Tridentina Synodo et ab oecumenico Concilio Vaticano, tradita, definita et declarata, praesertim de Romani Pontificis Primatu et infallibili magisterio indubitanter recipio atque profiteor; simulque contraria omnia, atque haereses quas-cumque ab Ecclesia damnatas et reiectas et anathematizatas, ego pariter damno, reiicio et anathematizo.

Hanc veram Catholicam fidem, extra quam nemo salvus esse potest, quam in praesenti sponte profiteor, et veraciter teneo, eandem integram, et inviolatam, usque ad extremum vitae spiritum, constantissime Deo adiuvante

retinere et confiteri, atque a meis subditis vel illis, quorum cura ad me in munere meo spectabit, teneri, doceri et praedicari, quantum in me erit, curaturum: ego idem N. spondeo, voveo ac iuro. Sic me Deus adiuvet, et haec sancta Dei Evangelia.

Laus tibi, Christe!



INDEX.

	Pag.
Praenotanda	3
De prima Congregatione generali	4
Hymni.	
I. In gloriam Christi Dei hominis	4
II. In honorem B. M. Virginis	5
III. In laudem s. Michaelis archangeli et omnium ss. Angelorum	7
Psalmi.	
I. Psalmus 8	7
II. Psalmus 14	8
III. Psalmus 23	9
IV. Psalmus 45	10
V. Psalmus 97	11
VI. Psalmus 116	12
VII. Psalmus 132	12
De prima Sessione publica	15
De Congregationibus particularibus	18
De secunda Congregatione generali	18
De altera Sessione publica	19
De tertia, quarta et quinta Congregatione generali	20
De tertia et ultima Sessione publica	21
Preces in Synodo persolvendae.	
A) In Congregationibus generalibus et particularibus:	
1. Ante actionem synodalem	23
2. Post actionem synodalem	24
B) In Sessionibus publicis:	
1. In Sessione primae diei	25
2. In Sessione secundae diei	35
3. In Sessione tertiae diei:	
a) Ante Sessionem	39
b) Oratio post Sessionem finalem	42
Ad sacratissimum Cor Iesu formula consecrationis recitanda	41
Acclamationes in fine Synodi faciendae	44
Forma professionis fidei	49



NARODNA IN UNIVERZITETNA
KNJIŽNICA



00000519930

3. div.
2. div.
1. div.
Odkupiti.
In. av. 100

